

## **Sabah, Sarawak tidak akan dibiarkan terbeban harga beras - Anwar**

Oleh ASYIKIN ASMIN

04 Oktober 2023 10:44pm

KOTA KINABALU - Kerajaan Persekutuan tidak akan membiarkan rakyat Sabah dan Sarawak dibebankan dengan kenaikan harga beras import sebaliknya langkah pemberian subsidi untuk makanan tersebut dilaksanakan untuk kedua-dua negeri terbabit.

Perdana Menteri Datuk Seri Anwar Ibrahim berkata, pengumuman pemberian subsidi itu membolehkan rakyat menikmati harga beras import serendah RM31 bagi 10 kilogram (kg).

"Sebab itu saya mengumumkan tidak mungkin kita minta rakyat Sabah yang miskin dibebankan dengan harga beras. Saya dimaklumkan oleh kerajaan negeri dan pegawai bahawa ada tempat bagi harga beras import RM45, ada RM41 dan ada RM39.

"Jadi bagaimana kita nak kurangkan beban kerana beras keperluan harian untuk makanan. Maka pada Isnin lalu kita umumkan untuk mengurangkan tekanan rakan-rakan Sabah dan Sarawak untuk tempat penghantaran di kota-kota di seluruh Sabah dan Sarawak.

"Kita turunkan harga import maknanya kerajaan Persekutuan hanya membayar subsidi hanya untuk Sabah dan Sarawak, tidak untuk Semenanjung kerana di Semenanjung ada beras tempatan. Maka harga beras di Sabah dan Sarawak daripada RM45 akan turun RM31 sahaja," katanya.

Beliau berkata demikian ketika berucap bagi merasmikan Konvensyen Pengurusan Hal Ehwal Islam di Pusat Konvensyen Antarabangsa Sabah (SICC) pada Rabu.

Anwar dalam pada itu turut mengakui kemungkinan harga beras akan sedikit meningkat di kawasan pedalaman namun perbincangan lanjut akan dilakukan mengenai kos pengangkutan terbabit.

"Mungkin di kawasan pedalaman ada sedikit peningkatan kos kerana harga pengangkutan. Itu nanti saya akan bincang dengan Ketua Menteri.

"Kos pengangkutan untuk Lembaga Pertubuhan Peladang (LPP) dan Lembaga Pemasaran Pertanian Persekutuan (FAMA) akan ditanggung sebahagian oleh Kementerian Kewangan supaya dapat mengurangkan dari segi peningkatan kos di pedalaman," katanya.

Sebelum itu, Menteri Pertanian dan Keterjaminan Makanan, Datuk Seri Mohamad Sabu mengumumkan kerajaan bersetuju memberi subsidi sebanyak RM950 setiap tan bagi bekalan beras putih import di Sabah dan Sarawak, mulai Khamis.